

ANGGOTA KABINET DARI PERAK DITAMBAH

Bahan asal dari Arkib
Negara Malaysia

Oleh RAJA AHMAD ZAINUDDIN

BARISAN Nasional Perak besar kemungkinan mendapat tambahan satu lagi Menteri penuh dalam kabinet baru di bawah pentadbiran Datuk Seri Dr. Mahathir Mohamad dan Datuk Musa Hitam (2M) sedikit hari lagi.

Sekiranya Datin Paduka Rafidah Aziz yang menang merebut kerusi Parlimen Kuala Kangsar terus dikekalkan dalam kabinet, impian UMNO Perak selama ini ingin seorang Menteri penuh tercapai juga.

Kali terakhir UMNO Perak mempunyai Menteri penuh ialah menerusi Tan Sri Ghazali Jawi yang memegang portfolio Pertanian di bawah kabinet bekas Perdana Menteri Tunku Abdul Rahman.

Kejayaan

Andainya benar Timbalan Menteri Kewangan, Datuk Mak Hon Kam dilantik menjadi Menteri penuh, bermakna jumlah Menteri Kabinet dari Perak akan bertambah dari tiga kepada empat semuanya.

Datuk Mak yang berjaya mempertahankan kerusinya di Tanjung Malim disebut-sebut akan mengisi kekosongan jawatan Menteri Buruh dan Tenaga Rakyat berikutnya Datuk Richard Ho digugurkan dari senarai calon MCA Perak.

Datuk Mak ialah juga Ketua MCA Perak dan salah seorang Naib Presiden parti pusat.

Menteri-menteri Perak yang lain dijangka akan dikekalkan. Mereka ialah Datuk S. Sany Vellu dari MIC dan Datuk Paul Léong dari Gerakan.

Datuk Sany Vellu yang juga Presiden MIC pusat berjaya mempertahankan kerusi Sungai Siput manakala Datuk Paul yang juga Timbalan Presiden Gerakan menempah kejayaan di kawasan Taiping.

Sekiranya mereka terpilih, bererti pertama kali sejak wujudnya BN di Perak, parti-parti komponennya, UMNO, MCA, Gerakan dan MIC masing-masing mempunyai seorang Menteri Kabinet.

Berdasarkan prestasi cemerlang BN Perak menyapu bersih semua 21 kawasan Parlimen, bilangan kerusi terbesar dalam pilihanraya umum 22 April lalu, beberapa orang muka baru juga mungkin berpeluang dilantik sama ada menduduki jawatan Timbalan Menteri atau Setiausaha Parlimen.

Bekas anggota Exco Kerajaan Negeri, Encik Peter Chin yang mencatat sejarah menewaskan 'orang kuat' DAP Perak, Encik Lim Cho Hock di kawasan Parlimen Ipoh disebut-sebut besar kemungkinan mengisi jawatan Timbalan Menteri.

Ini berikutan kekosongan jawatan Timbalan Menteri oleh Datuk Mak.

Encik Chin, 40 tahun ialah Setiausaha MCA Perak. Sebelum men-

cebur diri dalam arena politik, beliau adalah seorang jurutera dan akitek.

UMNO Perak yang menang semua 11 kerusi Parlimen lalu mendahului rakan-rakan komponen mereka yang lain juga mungkin berpeluang mendapat satu atau dua kerusi Timbalan Menteri atau Setiausaha Parlimen.

Muncul

Di antara tokoh muda berkelulusan tinggi yang disebut-sebut berpeluang memegang jawatan tersebut ialah Haji Zainal Abidin bin Zin, 41 tahun, Haji Mohd Tajol Rosli bin Tan Sri Ghazali, 37 tahun, dan Encik Abdul Raman bin Suliman, 33 tahun.

Haji Zainal Abidin, bekas guru lepasan Universiti Sains menang di kawasan Bagan Serai buat pertama kalinya. Beliau sebelum ini adalah anggota Exco Kerajaan mewakili kerusi Dewan Negeri Gunung Semangol.

Haji Mohd Tajol Rosli yang juga Timbalan Ketua Pemuda UMNO Perak pula berjaya mempertahankan kawasan Grik buat kali kedua. Beliau lulus dari salah sebuah universiti di Australia.

Encik Abdul Raman yang muncul buat pertama kali di kawasan Parit Buntar adalah bekas Ketua Penolong Setiausaha Kerajaan Perak dan pernah menjadi Timbalan Ketua UMNO bahagian di situ.

Kemenangan Encik

Ahmad Hambal bin Yeop Majlis, 40 tahun, bekas Guru Besar lepasan Universiti Malaya di Parlimen Parit juga mungkin mendapat perhatian penuh pimpinan.

UMNO Perak kini mempunyai kekosongan satu jawatan Timbalan Menteri berikutan pengguguran Encik Idris Abdul Rauf, bekas Wakil Rakyat Parit Buntar dari bertanding semula Khamis lalu.

Sementara itu, seorang lagi tokoh pemuda muka baru, Megat Junid Megat Ayub yang menang di kerusi Hillir Perak dikatakan akan tetap dikekalkan oleh Perdana Menteri, Datuk Seri Dr. Mahathir Mohamad selaku Setiausaha Politikanya.

Mengenal harapan Datuk Michael Chen yang menang atas tiket Gerakan di Parlimen Bruas untuk menduduki kabinet, para pemerhati politik menolak sebarang kemungkinan beliau mempunyai peluang memandangkan parti tersebut pada keseluruhan cuma menang tiga kerusi di Perak.

Barisan Nasional Perak sebelum ini mempunyai tiga Menteri menerusi Datuk Ho, Datuk Sany Vellu dan Datuk Paul Leong manakala Timbalan Menteri melalui Datuk Mak Hon Kam, Datuk Seri Haji Kamaruddin Mat Isa dan Encik Idris Abdul Rauf.

Mengikuti keputusan pilihanraya peringkat Parlimen Perak, UMNO menang 11 kerusi, diikuti oleh MCA 6, Gerakan 3 dan MIC 1.